

Agóid Chiúin

Ceist 1

Beidh tú ag féachaint anois ar thuirisc faoin agóid a bhí ar bun i mBaile Átha Cliath inné. Sula bhféachann tú ar an mír, bí ag obair leis an duine in aice leat agus déan iarracht na ceisteanna seo a fhreagairt

Cén fáth a raibh na mic léinn ag máirseáil inné?

Cad atá ar eolas agat maidir le polasaithe Fhine Gael i leith na Gaeilge?

An gceapann tú go bhfuil locht ar an mbealach ina múintear an Ghaeilge?

Ceist 2

Féach ar an mír anois. Déan iarracht na téarmaí thíos a mheaitseáil leis an aistriúchán ceart.

Mac Léinn _____ Petition
Ceannáras _____ Stance
Éigeantach _____ Proposals
Achainí _____ University
Tacaíocht _____ Headquarters
Ollscoil _____ Compulsory
Agóid _____ Protest
Seasamh _____ Public Meetings
Moltaí _____ Student
Cruinnithe Poiblí _____ Support

Ceist 3

Anois féach ar an mír don dara huair agus déan iarracht na ceisteanna thíos a fhreagairt.

1. Cé mhéad mac léinn a bhailigh taobh amuigh den Dáil inné?
2. Cé mhéad síniú a bhí ar an achainí?
3. Bronnadh an achainí ar cén Pháirtí Polaitíochta?
4. Cad a bhí á ndáileadh ag lucht na hagóide ar dhaoine a bhí ag dul ag obair ar maidin?
5. Cá leanfar leis an agóid i rith na seachtaine? (3 áit)

Ceist 4 Déan iarracht na bearnaí a líonadh sa sliocht thíos.

Chuaigh os cionn 500 mac léinn i mbun _____ taobh amuigh den Dáil tráthnóna i gcoinne mholtaí Fhine Gael deireadh a chur leis an nGaeilge mar ábhar _____ san Ardteistiméireacht. Chuaigh siad¹ as sin go _____ Fhine Gael le _____ a bhí sínithe ag cúig mhíle dhéag duine a bhronnadh ar an bpáirtí. _____ siad leis an agóid, a deir siad, go dtí go dtarraingeoidh Fine Gael siar an _____.

(hachainí, moladh, éigeantach, agóide, Ceannáras, Leanfaidh)

Ceist 5 ‘Cuireadh’

a) Cén ghné den ghramadach a léirítear thuas?

b) Déan iarracht líne a chur faoi shamplaí den saorbhriathar, agus aon bhriathar neamhrialta sa sliocht thíos.

Cuireadh tús go luath le hagóid na mac léinn ar maidin agus iad ag dáileadh bileoga eolais ar dhaoine a bhí ag taisteal chun na hoibre, féachaint le tacaíocht a fháil le cur i gcoinne an mholta maidir leis an nGaeilge a bheith roghnach san Ardteist. Labhair siad le cúig chéad duine ar a laghad, a deir siad, gan trácht ar líon na mbileoga a dáileadh. Thug siad aghaidh ar Theach Laighean i dteannta mac léinn ó na hollscoileanna ar fad i gCúige Laighean, mar aon le scata mór daltaí meánscoile.

Ceist 6 Pléigh an ráiteas thíos leis an duine in aice leat nó mar rún díospóireachta sa rang.

‘Aontaím le polasaí Fhine Gael, go dtiocfaidh feabhas ar an teanga mura bhfuil sí éigeantach’

Treoracha agus Freagraí

Ceist 1 Is féidir na ceisteanna seo a phlé leis an duine in aice leat.

Ceist 2 Mac Léinn _____ **Student**
Ceannáras _____ **Headquarters**
Éigeantach _____ **Compulsory**
Achainí _____ **Petition**
Tacaíocht _____ **Support**
Ollscoil _____ **University**
Agóid _____ **Protest**
Seasamh _____ **Stance**
Moltaí _____ **Proposals**
Cruinnithe Poiblí _____ **Public Meetings**

Ceist 3

- 1 Bhailigh os cionn 500 mac léinn taobh amuigh den Dáil inné.
- 2 Bhí 1,500 síniú ar an achainí.
- 3 Bronnadh an achainí ar Fhine Gael.
- 4 Bhí bileoga eolais á ndáileadh ag lucht na hagóide ar dhaoine a bhí ag dul ag obair ar maidin.
- 5 Leanfar leis an agóid i nGaoth Dobhair, i gCiarraí agus i gCill Dara i rith na seachtaine.

Ceist 4 Chuaigh os cionn 500 mac léinn i mbun **agóide** taobh amuigh den Dáil tráthnóna i gcoinne mholtaí Fhine Gael deireadh a chur leis an nGaeilge mar ábhar **éigeantach** san Ardteistiméireacht. Chuaigh siad² as sin go **Ceannáras** Fhine Gael le **hachainí** a bhí sínithe ag cúig mhíle dhéag duine a bhronnadh ar an bpáirtí. **Leanfaidh** siad leis an agóid, a deir siad, go dtí go dtarraingeoidh Fine Gael siar an **moladh**.

Ceist 5 Léirítear an saorbhriathar sa sampla thuas.

Cuireadh tús go luath le hagóid na mac léinn ar maidin agus iad ag dáileadh bileoga eolais ar dhaoine a **bhí** ag taisteal chun na hoibre, **féachaint** le tacaíocht a **fháil** le cur i gcoinne an mholta maidir leis an nGaeilge a **bheith** roghnach san Ardteist. Labhair siad le cúig chéad duine ar a laghad, a **deir** siad, gan trácht ar líon na mbileoga a **dáileadh**. **Thug** siad aghaidh ar Theach Laighean i dteannta mac léinn ó na hollscoileanna ar fad i gCúige Laighean, mar aon le scata mór daltaí meánscoile.

Ceist 6 Is féidir an ráiteas a phlé nó díospóireacht a dhéanamh sa rang.

Máire T Ní Mhadaoin

Bail ó Dhia oraibh. Chuaigh os cionn 500 mac léinn i mbun agóide taobh amuigh den Dáil tráthnóna i gcoinne mholtaí Fhine Gael deireadh a chur leis an nGaeilge mar ábhar éigeantach san Ardeistiméireacht. Chuaigh siad³ as sin go Ceannáras Fhine Gael le hachainí a bhí sínithe ag cúig mhíle dhéag duine a bhronnadh ar an bpáirtí. Leanfaidh siad leis an agóid, a deir said, go dtí go dtarraingeoidh Fine Gael siar an moladh.

Sorcha Ní Riada

Cuireadh tús go luath le hagóid⁴ na mac léinn ar maidin agus iad ag dáileadh bileoga eolais ar dhaoine a bhí ag taisteal chun na hoibre, féachaint le tacaíocht a fháil le cur i gcoinne an mholta⁵ maidir leis an nGaeilge a bheith roghnach san Ardeist. Labhair siad⁶ le cúig chéad duine ar a laghad, a deir siad, gan trácht ar líon na mbileoga a dáileadh. Thug siad⁷ aghaidh ar Theach Laighean i dteannta mac léinn ó⁸ na hollscoileanna ar fad i gCúige Laighean mar aon le scata mór daltaí meánscoile.

Aodhán Ó Deá-Aontas na Mac Léinn

Táimid anseo inniu le taispeáint⁹ do Fhine Gael¹⁰ go bhfuil daoine óga feargach faoin seasamh atá acu faoin nGaeilge¹¹ don Ardeist. Níl muide chun glacadh leis. Ceapaimid má tá sé roghnach go ndéanfaidh sé an-an dochar don teanga. Nílimid sásta glacadh leis an bpolasaí seo, nílimid chun vótaí a thabhairt do Fhine Gael agus táimid ag rá leo an polasaí a athrú anois.¹² Níl daoine óga ag iarraidh go mbeidh deireadh leis an nGaeilge. Ná tabhair vóta don pháirtí má leanann siad leis an bpolasaí seo.

Micheál Clancy-Ógra Fhine Gael

I measc siúd a bhí i láthair bhí ball d'Ógra Fhine Gael a bhí ag caint ar a shon féin. "Tá mé fós i mo bhall d'Ógra Fhine Gael agus Fine Gael agus tá súil agam go mbeidh rialtas againn i gceann coicíse mar sin.¹³ Níl mé ag moladh¹⁴ gan vóta a chaitheamh d'¹⁵Fhine Gael ach gach aon duine i Fine Gael, taobh amuigh de Fhine Gael, nach bhfuil sásta leis an bpolasaí seo, molaim daoibh teacht amach agus a¹⁶ rá nach bhfuil siad sásta, ach tá daoine ann gan amhras."

Leanfar leis an agóid ag cruinnithe poiblí i nGaoth Dobhair, i gCiarraí agus Cill Dara i rith na seachtaine.

³ Chuadar deirtear

⁴ Le agóid deirtear

⁵ an moladh deirtear

⁶ D'labhradar deirtear

⁷ Thugadar

⁸ ós a deirtear i gcanúint na Mumhan

⁹ le thaispeáint a deirtear

¹⁰ Fágtar an séimhiú ar lár

¹¹ Níor chuir sé urú i bhfeidhm

¹² Athraigh an polasaí anois

¹³ So deirtear

¹⁴ ag mholadh deirtear

¹⁵ ar Fhine Gael deirtear

¹⁶ ag rá deirtear